

04 APR 1997

Mahathir-Tiba (Bergambar)

DR MAHATHIR TIBA UNTUK LAWATAN KERJA SEHARI KE KELANTAN

KOTA BAHARU, 4 April (Bernama) -- Perdana Menteri Datuk Seri Dr Mahathir Mohamad tiba di Lapangan terbang Sultan Ismail Petra, Pengkalan Chepa di sini, hari ini untuk lawatan kerja sehari ke Kelantan.

Dr Mahathir tiba dengan pesawat Tentera Udara Diraja Malaysia pada pukul 9 pagi bersama isteri Datin Seri Dr Siti Hasmah Mohamed Ali.

Menteri Besar Datuk Nik Abdul Aziz Nik Mat mengetuai pemimpin-pemimpin negeri lain, pemimpinan Barisan Nasional negeri dan kira-kira 3,000 rakyat Kelantan menyambut ketibaan beliau.

Sejurus tiba, Dr Mahathir diberikan cenderamata khas daripada rakyat Kelantan melalui empat orang pemimpin masyarakat sebagai tanda penghargaan kepada beliau yang diiktiraf sebagai pemimpin bertaraf dunia apabila diberi Anugerah Raja Faisal oleh kerajaan Arab Saudi baru-baru ini .

Empat mereka terdiri daripada Timbalan Pengerusi Badan Perhubungan Umno Kelantan Datuk Annuar Musa bagi pihak ahli politik, Haji Mohamad Noor Tahir mewakili ulama Kelantan, Tengku Abdul Kadir Tengku Chik mewakili warga tua dan Norizan Ibrahim mewakili golongan belia.

Perdana Menteri mempunyai jadual ketat sepanjang lawatan ini bermula dengan merasmikan kilang tekstil Koperasi Usaha Bersatu (KUB) di Pengkalan Chepa, dekat sini.

Dr Mahathir juga akan menyaksikan majlis menandatangani perjanjian usahasama antara KUB Malaysia Berhad dan Keloil Sdn Bhd, syarikat milik kerajaan negeri, bagi memajukan projek petrokimia di Pantai Senok.

Pada pukul 10.30 pagi, Perdana Menteri akan melawat dan merasmikan kilang Ain Medicare di Pengkalan Chepa.

Pada petangnya, Dr Mahathir dijadual menyampaikan amanat kepada pegawai-pegawai kerajaan persekutuan dan negeri, ahli korporat, pemimpin masyarakat serta diikuti dialog di Dewan Sri Pendekar, Wadi Sofia, Binjai dekat sini, pada pukul 3 petang.

Dr Mahathir juga akan menghadap Sultan dan Raja Perempuan Kelantan pada pukul 5 petang di Istana Mahkota di sini sebelum berlepas pulang ke Kuala Lumpur pada pukul 6.30 petang. --BERNAMA

BD RON